

Na osnovu člana 8. stav 3. alineja 28 Zakona o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/09) i člana 70. stav 1. tačka 2. Statuta Općine Vogošća („Službene novine Kantona Sarajevo“ broj: 27/14 – Prečišćeni tekst 14/15 i 9/20) Općinsko vijeće Vogošća na sjednici održanoj, 30.06.2022. godine donijelo je

ODLUKU

O VIZIJI RAZVOJA MJESNIH ZAJEDNICA OPĆINE VOGOŠĆA

Član 1.

1. Vizija razvoja mjesnih zajednica Općine Vogošća temelji se na sljedećim principima:

- **Reprezentativnosti** – kao principa koji podrazumijeva da u izboru organa mjesnih zajednica treba obezbijediti učešće što većeg broja različitih kategorija stanovništva kako bi se postigla njihova proporcionalnost zastupanja i rada, naročito vodeći računa o mladima, ženama i socijalno isključenim kategorijama.
- **Odgovornosti** – kao principa koji podrazumijeva da mjesna zajednica mora biti odgovorna prema svojim građanima, ali i prema lokalnim vlastima. Legitimno izabrani predstavnici mjesnih zajednica trebaju odgovorno vršiti funkcije koje su im dodijeljene.
- **Inkluzivnosti** – kao principa kojim se podstiče uključenost svih građana u rad i aktivnosti mjesnih zajednica, naročito žena, mladih i socijalno isključenih grupa.
- **Koordinacije** – kao principa koji podrazumijeva unapređenje koordinacije, komunikacije i međusobne saradnje između mjesnih zajednica i organa lokalne vlasti kao i između mjesnih zajednica i građana i ostalih aktera od značaja za razvoj mjesne zajednice kao što su organizacije civilnog društva, komunalna preduzeća, lokalne javne institucije, ne ograničavajući se na navedeno.
- **Transparentnosti** – kao principa koji podrazumijeva otvorenost za javnost i dostupnost informacija vezanih za rad mjesnih zajednica uključujući i informacije o načinu i izvorima finansiranja mjesnih zajednica.
- **Profesionalizacije i osposobljenosti predstavnika mjesnih zajednica** – kao principa koji podrazumijeva povećanje nivoa profesionalizacije i osposobljenosti predstavnika mjesnih zajednica kroz kontinuiranu edukaciju i obuku, te osiguravanje prenosa stečenog znanja i iskustava na sve buduće predstavnike mjesnih zajednica.
- **Nezavisnosti i depolitizacije** – kao principa kojim se nastoji omogućiti nezavisno i depolitizovano funkcionisanje mjesnih zajednica, kao predstavnika zajednice i građana i građanki u poslovnima zastupanja njihovih interesa kroz nezavisno donošenje odluka u skladu sa zakonom i statutom.
- **Demokratskog odlučivanja i participativnosti** – kao principa koji će osigurati demokratsko pravo na učešće u odlučivanju kao i pravo da građani i građanke imaju pravo da biraju i budu birani na pozicije koje obavljaju u strukturama uspostavljenih tijela mjesne zajednice.

2. Vizija razvoja mjesnih zajednica Općine Vogošća sprovodiće se kroz četiri modela mjesne zajednice:
 - Mjesna zajednica kao prostor za zagovaranje i pristup upravi;
 - Mjesna zajednica kao mjesto za pružanje usluga stanovništvu;
 - Mjesna zajednica kao prostor za učešće građana u odlučivanju;
 - Mjesna zajednica kao društveni centar.

3. Vizija razvoja mjesnih zajednica kroz model **Mjesna zajednica kao prostor za zagovaranje i pristup upravi** sprovodiće se kroz sljedeće identifikovane funkcionalne oblasti:
 - Efikasno uključivanje mjesnih zajednica u procese praćenja primjene propisa koji se tiču mjesne samouprave;
 - Pružanje pravovremenih povratnih informacija predstavnicima mjesnih zajednica;
 - Podizanje svijesti o potrebi većeg učešća žena u strukturama mjesnih zajednica i akcijama koje mjesna zajednica vodi u svrhu osiguravanja kvalitetnijeg života za sve na području mjesne zajednice;
 - Aktivniju uloga savjeta mjesnih zajednica u animiranju građana da uzmu aktivno učešće u javnim raspravama vezanim za budžet, strategije, urbanističko-planske dokumente, izmjene statuta, kao i u drugim pitanjima od značaja i interesa za građane u mjesnim zajednicama.

4. Vizija razvoja mjesnih zajednica kroz model **Mjesna zajednica kao mjesto za pružanje usluga stanovništvu** sprovodiće se kroz sljedeće identifikovane funkcionalne oblasti:
 - Stvaranje minimalnih organizacijskih, prostornih i tehničkih uslova za rad svih mjesnih zajednica na području općine Vogošća, uvođenje programa obuke za osobe zadužene za rad sa mjesnim zajednicama
 - Stvaranje uvjeta da mjesna zajednica bude prepoznata kao mjesto gdje građani i građanke dobijaju pravovremene i pouzdane informacije, ostavuju svoja prava i rješavaju probleme
 - Utvrđivanje načina i oblika razmjene informacija i zajedničkog djelovanja sa Centrom za socijalni rad u svrhu sveobuhvatnije podrške licima u stanju socijalne potrebe;
 - Jačanje kapaciteta i uloge mjesne zajednice u organizaciji građanskih volonterskih radnih akcija.

5. Vizija razvoja mjesnih zajednica kroz model **Mjesna zajednica kao društveni centar** sprovodiće se kroz sljedeće identifikovane funkcionalne oblasti:
 - Formalno-pravno uređenje korištenja prostorija mjesne zajednice kao društvenog centra, centra kulture i sporta;
 - Razvoj saradnje sa nevladinim organizacijama, naročito saradnje sa udruženjima koja zastupaju interese mladih, žena i osoba sa invaliditetom, i jačanje svijesti o ulozi nevladinih organizacija i mogućnostima za konkretnu saradnju mjesnih zajednica sa nevladinim organizacijama;
 - Podsticanje inicijativa koje promovišu aktivizam pojedinaca u mjesnim zajednicama;

- Osiguranje pristupa i adekvatnih sadržaja za različite ugrožene skupine u mjesnoj zajednici kroz programe podrške Općine, donatorske programe i aktivniji angažman Savjeta mjesnih zajednica.
6. Vizija razvoja mjesnih zajednica kroz model **Mjesna zajednica kao prostor za učešće građana** u donošenju odluka sprovodiće se kroz sljedeće identifikovane funkcionalne oblasti:
- Osiguranje prostora za okupljanje građana s ciljem njihovog učešća u procesima donošenja odluka na lokalnom nivou;
 - Utvrđivanje inovativnih mehanizama za proaktivnije učešće građana u javnim raspravama i drugim oblicima građanskog učešća u poslovima mjesne samouprave;
 - Afirmisanje djelovanje foruma građana kao oblika demokratskog odlučivanja, promocijom sadržaja koji prate organizaciju i ishode foruma;
 - Uspostavljanje učinkovitije komunikacije i većeg stepena informisanosti građana o pitanjima važnim za građansko učešće u donošenju odluka.
7. Zadužuje se načelnik Općine da u roku od 90 dana od dana usvajanja Odluke o viziji razvoja mjesnih zajednica Općine Vogošća, putem svojih stručnih službi izradi Operativni plan ove vizije za period 2022-2025. Operativni plan treba da sadrži pregled svih projekata i aktivnosti koje će biti preduzete u narednom trogodišnjem periodu kako bi se implementirala Odluka o viziji razvoja mjesnih zajednica Općine Vogošća. Pored projekata i aktivnosti, Operativnim planom će se utvrditi i vremenski rokovi za implementaciju aktivnosti, nosioci realizacije, neophodna finansijska sredstva, načini mjerenja učinaka i nadzora nad implementacijom Operativnog plana Vizije, kao i dinamika izvještavanja.
8. Kroz izradu Operativnog plana posebno je važno da se identifikuju oni projekti i aktivnosti koji će doprinijeti što većem uključivanju različitih kategorija stanovništva u organe mjesne zajednice, čime će se osigurati reprezentativnost i njihova proporcionalnost zastupanja i rada, a naročito vodeći računa o zastupljenosti žena i mladih.

Član 2.

Ova Odluka stupa na snagu osmog dana od dana objavljivanja u „Službenim novinama Kantona Sarajevo“.

Broj:01-02-1136/22

Vogošća, 30.06.2022. godine

